

## REGLUGERÐ

**um aðlögun fullvirðisréttar að innanlandsmarkaði og um greiðslumark til framleiðslu mjólkur á lögbýlum verðlagsárið 1992-1993.**

### I. KAFLI.

#### Aðlögun fullvirðisréttar.

##### 1. gr.

##### *Fullvirðisréttarskrá.*

Framleiðsluráð landbúnaðarins skal gera sérstaka skrá um fullvirðisrétt til framleiðslu mjólkur á lögbýlum, sem skal liggja fyrir eigi síðar en 10. september 1992.

Við gerð þeirrar skrár skal gæta þess að fullvirðisréttur, sem lagður hefur verið inn til leigu hjá búnaðarsambandi eða leigður á milli einstaklinga, sé skráður hjá leigusala.

Um úthlutanir búnaðarsambanda fer eftir fullvirðisréttarskrá verðlagsársins 1991-1992. Þau búnaðarsambönd sem nýttu sér heimild 1. og 2. tl. 2. mgr. 2. gr. rg. nr. 262/1991 til endurúthlutunar skulu tilkynna Framleiðsluráði landbúnaðarins um endanlega úthlutun á sínu svæði eigi síðar en 1. september 1992. Miðað skal við að þessi fullvirðisréttur verði skráður á sama lögbýli og hann var skráður verðlagsárið 1991-1992 nema sérstök rök mæli með öðru að mati búnaðarsambands.

Framleiðnisjóður landbúnaðarins skal tilkynna Framleiðsluráði landbúnaðarins fyrir 1. september 1992 um fullvirðisrétt sem tekinn verður í notkun á ný verðlagsárið 1992-1993 að liðnum leigutíma og þá leigusamninga sem breytast munu í kaupsamninga og falla þannig út af sérstakri fullvirðisréttarskrá.

Þau 20% fullvirðisréttar sem haldið var eftir við sölu á milli framleiðenda og skráð voru hjá seljanda, sbr. 1. og 2. tl., 2. mgr. 2. gr. rg. nr. 262/1991, falla niður 31. ágúst 1992.

##### 2. gr.

##### *Niðurfærsla.*

Þann 1. september 1992 verður heildarfullvirðisréttur að frátöldum þeim fullvirðisrétti sem bundinn er í leigusamningum við Framleiðnisjóð landbúnaðarins færður niður að heildargreiðslumarki mjólkur verðlagsárið 1992-1993, þ.e. í 100 milljónir lítra. Fullvirðisréttur/greiðslumark sem áfram verður bundinn í leigusamningum við Framleiðnisjóð skal taka sömu breytingum og annar fullvirðisréttur/greiðslumark.

Fullvirðisréttur hvers lögbýlis að teknu tilliti til staðfesta aðilaskipta 31. ágúst 1992 verður færður niður um sama hlutfall og heildarfullvirðisréttur.

### II. KAFLI.

#### Um greiðslumark.

##### 3. gr.

##### *Heildargreiðslumark og greiðslumark lögbýla.*

Heildargreiðslumark til framleiðslu mjólkur verðlagsárið 1992-1993 er 100 milljónir lítra mjólkur og skiptist í greiðslumark lögbýla. Greiðslumark lögbýla reiknast í lítrum mjólkur.

Samanlagt greiðslumark lögbýla verður 100 milljónir lítra. Greiðslumark hvers lögbýlis verðlagsárið 1992-1993 skal vera jafnt fullvirðisrétti þess 1. september 1992 að lokinni aðlögun fullvirðisréttar að innanlandsmarkaði.

#### 4. gr.

##### *Fullvirðisréttur í leigusamningum við Framleiðnisjóð.*

Handhafa leigusamnings við Framleiðnisjóð landbúnaðarins er heimilt að hefja framleiðslu við lok leigutíma og nýta rétt lögbýlis til greiðslumarks að uppfylltum eftirfarandi skilyrðum:

- a) Tilkynna skal Framleiðnisjóði landbúnaðarins með tilskildum fyrirvara hvort hefja á framleiðslu.
- b) Starfsleyfi og fullgild framleiðsluástaða skal vera fyrir hendi á lögbýlinu.

#### 5. gr.

##### *Aðilaskipti að greiðslumarki.*

Frá 1. september 1992 eru heimil aðilaskipti að greiðslumarki á milli lögbýla, með eftirfarandi takmörkunum:

- a) Aðilaskipti geta aðeins tekið gildi um verðlagsáramót. Þó geta slík skipti vegna verðlagsársins 1992-1993 átt sér stað fram til 1. janúar 1993.
- b) Greiðslumark byggt á fullvirðisrétti sem leigður var Framleiðnisjóði landbúnaðarins eða öðrum framleiðendum fyrir gildistöku reglugerðar nr. 527/1988, þ.e. 22. desember 1988, má því aðeins selja að það hafi verið í framleiðslu hjá leigusala sbr. 4. gr., næstliðin tvö ár fyrir sölu. Framleiðendum sem gerðu leigusamning sín á milli er þó heimilt að breyta þeim í kaupsamninga. Heimilt er að selja allt greiðslumarkið þegar framleiðsla á lögbýlinu hefur náð 70% greiðslumarksins að meðaltali í tvö ár, að öðrum kosti í hlutfalli við nýtingu þess.
- c) Sé ábúandi lögbýlis annar en eigandi þess þarf samþykki beggja fyrir því að afsala greiðslumarki frá lögbýli.
- d) Eigi að selja greiðslumark út af búnaðarsambandssvæði skal tilkynna það viðkomandi búnaðarsambandi. Skal söluverð og aðrir skilmálar tilgreindir á tæmandi hátt. Eiga aðrir bændur á búnaðarsambandssvæðinu þá forkaupsrétt að greiðslumarkinu í fjórar vikur eftir að tilkynning um sölu berst til búnaðarsambands. Sé forkaupsréttar neytt og andvirði greiðslumarks ekki staðgreitt skal fullnægjandi trygging sett að mati seljanda fyrir eftirstöðvum.

Nú á framleiðandi fleiri en eitt lögbýli eða flytur af einu lögbýli á annað og er þá heimilt að sameina greiðslumark beggja lögbýlanna án takmarkana samkvæmt ákvæðum a- og d-liðar þessarar greinar. Á sama hátt er landbúnaðarráðherra heimilt að flytja greiðslumark milli lögbýla í eigu ríkisins.

Aðilaskipti greiðslumarks skulu tilkynnt á þar til gerðum eyðublöðum sem Framleiðsluráð landbúnaðarins lætur í té og liggja frammi á skrifstofum búnaðarsambanda. Með tilkynningu um aðilaskipti að greiðslumarki skal fylgja staðfesting um eignarhald að lögbýli. Aðilaskiptin taka fyrst gildi þegar staðfesting Framleiðsluráðs landbúnaðarins liggur fyrir.

#### 6. gr.

##### *Nýting greiðslumarks lögbýla.*

Heimilt er framleiðanda að nýta 104% af greiðslumarki lögbýlisins með innleggi í afurðastöð á verðlagsárinu 1992-1993.

Áður en afurðastöð kaupir eða selur mjólk umfram 4% greiðslumarks framleiðanda skal gert sérstakt samkomulag milli afurðastöðvar og framleiðanda um þau viðskipti. Samsvarandi magn afurða skal markaðsfært erlendis á ábyrgð viðkomandi aðila. Þó getur Framleiðsluráð

landbúnaðarins heimilað sölu þeirra innanlands ef framleiðsla innan 104% markanna verður minni en sala og birgðastaða gefur tilefni til.

7. gr.

*Brottfall og geymsla greiðslumarks.*

Greiðslumark sem ekki hefur verið nýtt til framleiðslu að neinu leyti í full tvö verðlagsár fellur niður.

Heimilt er framleiðanda að leggja greiðslumark lögbýlisins inn til geymslu til 31. ágúst 1998 og sætir það þá sömu breytingum og annað greiðslumark.

III. KAFLI.

**Ýmis ákvæði.**

8. gr.

*Útreikningur á greiðslumarki lögbýla.*

Framleiðsluráð landbúnaðarins reiknar út greiðslumark til framleiðslu mjólkur og heldur skrá yfir greiðslumark lögbýla og handhafa réttar til beinna greiðslna, og lætur afurðastöðvum og búnaðarsamböndum í té eintak af henni fyrir starfssvæði viðkomandi afurðastöðvar og búnaðarsambands.

Framleiðsluráð landbúnaðarins aflar upplýsinga og annast útreikninga vegna framkvæmdar þessarar reglugerðar og hefur eftirlit með uppgjöri afurðastöðva við framleiðendur.

Afurðastöðvum er skylt að láta Framleiðsluráði landbúnaðarins í té allar þær upplýsingar sem að gagni geta komið við störf þess og þær geta veitt.

9. gr.

*Tilkynningar um greiðslumark lögbýla.*

Framleiðsluráð landbúnaðarins skal tilkynna framleiðendum um greiðslumark lögbýlisins. Þeir eiga þess kost að gera athugasemdir við það og skulu þær berast Framleiðsluráði landbúnaðarins innan 15 daga frá dagsetningu tilkynningar um greiðslumark, ella gildir það fyrir verðlagsárið. Framleiðsluráð landbúnaðarins endurskoðar útreikninga, sem athugasemdir eru gerðar við og tilkynnir framleiðanda niðurstöðu sína.

Berist Framleiðsluráði ekki athugasemdir við þá niðurstöðu innan 25 daga frá dagsetningu úrskurðarins, gildir hann fyrir hlutadeigandi verðlagsár.

Uni viðkomandi framleiðandi ekki þeirri niðurstöðu, hefur hann rétt til þess að skjóta ágreiningnum með rökstuddri kæru til landbúnaðarráðuneytis.

10. gr.

*Viðurlög og gildistaka.*

Brot á reglugerð þessari varða viðurlögum samkvæmt 59. gr. laga nr. 46 27. júní 1985 um framleiðslu, verðlagningu og sölu á búvörum. Með mál út af brotum skal farið að hætti opinberra mála.

Reglugerð þessi er sett samkvæmt lögum nr. 46 27. júní 1985 um framleiðslu, verðlagningu og sölu á búvörum ásamt síðari breytingum og öðlast þegar gildi. Jafnframt er vísað til samnings dags. 16. ágúst 1992 og 7. gr. samnings dags. 11. mars 1991 sem landbúnaðarráðherra, f.h. ríkisstjórnar Íslands og Stéttarsamband bænda hafa gert um stjórnun og aðlögun mjólkurframleiðslunnar.

*Landbúnaðarráðuneytið, 31. ágúst 1992.*

**Haldór Blöndal.**

*Jóhann Guðmundsson.*